



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

*Komunikadu Imprensa*  
*Distritu Ermera*  
*12 Agostu 2014*

**Suku Ura-Hou Ezije kosultasaun adekuadu ba Ezbosu  
Pakote Lei ba Rai no Alterasaun ba Lei Pensaun Vitalisia**

Iha 7 Agostu 2014, ema hamutuk nain 33 kompostu hosi Feto nain 10 no Mane 23 hosi estrutura suku, representante grupu feto, estudante, joventude feto no mane inklui membru komunidadade sira hiit an ba Sede Suku Ura-Hou, Sub-Distritu Hatulia, Distritu Ermera hodi partisipa iha treinamentu ne'ebé organiza hosi JSMP. Treinamentu ne'e kobre asuntu sira kona-ba demokrasia, prosesu halo lei no kna'ar orgaun soberanu sira nian.

*“Atividade treinamentu ne'e hanesan ativadade kontinuasaun hosi JSMP, liu-liu atu hasa'e koñesimentu komunidadade nian kona-ba demokrasia, prosesu halo lei inklui informasaun jerál kona-ba kna'ar prinsipal sira hosi órgaun soberanu Estado Timor-Leste nian inklui lei sira ne'ebé parlamentu sira produs,”* dehan Diretór Ezekutivu JSMP, Luis de Oliveira Sampaio.

**Julião da Costa**, nu'udar Xefe Suku Urahou agradese ba JSMP tanba desimina informasaun importante sira hanesan kna'ar orgaun soberanu sira nian, lalaok demokrasia no prosesu halo lei iha Timor Leste. Aleinde ne'e, Xefe Suku Urahou, lori komunidadade sira nia naran agreedese ba JSMP tanba bele fahe informasaun importante sira ne'e iha sira nia suku, nune'e bele aumenta tan koñesimentu komunidadade nian kona-ba servisu órgaun soberanu sira estadu nian iha Timor Leste.

Xefe Suku Urahou no partisipante sira, depois rona tiha esplikasaun kona-ba kompetensia servisu orgaun soberanu sira husu, ba meja Parlamentu Nasional (PN) atu halo konsultasaun adekuadu fila fali ba Ezbosu Pakote Lei ba Rai, tanba liga ba kna'ar PN nian. Suku Urahou prezenta kazu kona-ba Rai Eransa iha tempu okupasaun Portugés ho Suku Mau-Ubo.

Populasaun Mau-Ubo mak okupa ka hela iha sira nia rai ho (hak pakai) maibe depois ukun an sira reklama katak sira mak sai nain ba rai. Povu Urahou lasimu reklamasaun ne'e tanba Lei seidauk iha no tuir istoria rai ne'e partense ba teritoriu Suku Urahou nian. Suku Mau-Ubo okupa tanba selu impostu ba governu portuges, ne'ebé povu Urahou konsidera hanesan okupasaun ilegal no agora povu Urahou hakarak reklama no foti fali nia rai.

Treinamentu ne'e, hetan antusiasmu husi partisipante sira no rekomenda ba JSMP atu bele hato'o sira nia ezijensia ba PN. Sira husu ba PN atu halo lei presiza halo konsultasaun to'o baze iha sira nia aldeia, suku, sub-distritu no distritu sira. Aleinde ne'e partisipante treinamentu sira mos ezije ba PN atu halo alterasaun ba Lei Pensaun Vitalisia, tanba konsidera Lei ne'e favorese deit ba estrutura eis titulares orgaun soberanu sira no ignora interese komun. Partisipante sira mos enkoraza sosiedade sivíl atu kontinua observa servisu Parlamentu Nasionál nian.

Treinamentu ne'e remata ho fahe manual treinamentu ba partisipante sira hodi distribui tutan ba comunidade sira seluk ne'ebé la partisipa. JSMP mós informa ba partisipante sira katak, iha tinan ne'e JSMP sei realiza Semináriu Nasionál iha Dili hodi konvida fila fali representantes suku atu hasoru malu ho deputadu sira.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](https://www.facebook.com/timorleste.jsmp)